



**Vischnaunca Lumnezia**

| Palius 32D, CH-7144 Vella

| +41 (0)81 920 60 00

| [info@lumnezia.ch](mailto:info@lumnezia.ch)

| [www.lumnezia.ch](http://www.lumnezia.ch) |

---

## PROTOCOL RADUNONZA COMUNALA LUMNEZIA 16 DA SETTEMBER 2022

---

2022/02

16 DA SETTEMBER 2022  
CANZLIA COMUNALA, 7144 VELLA  
Palius 32D, 7144 Vella

**Tractandas**

1. Avertura .....	3
2. Protocol dalla radunonza communal da dils 18 da mars 2022 (2022/01).....	3
3. Rapport e quen annual 2021 .....	4
Rapport da revisiun dalla cumissiun da gestiun.....	6
Approbaziun dil quen annual 2021 e scarica alla suprastanza communal .....	6
4. Lavurs da catram e remplazzament lingias d'aua ella via da quartier Trutg el vischinadi da Vella.....	6
5. Rendaquens finals da projects .....	7
a) Midadas dils locals d'uniuns a Cumbel .....	7
b) Biblioteca Lumnezia .....	7
c) Quen final pilotadi central pil provediment d'aua.....	8
6. Varia .....	9

## Protocol dalla radunonza communal Lumnezia (2022/01)

Datum: Venderdis, ils 16 da settember 2022  
 Liug: Halla plurivalenta dalla casa da scola Sutvitg 28E, 7144 Vella  
 Cuoz: 20:00 – 21.30 uras  
 Presents: 50 votantas e votants, 1 hosp  
 Parsura: Curdin Capeder, vicepresidente communal e schef dil department per turissem  
 Actuara: Silvana Caviezel, actuara substituta

### Tractandas

#### 1. Avertura

Muort absenza dil president communal Daniel Solèr meina il vicepresidente Curdin Capeder la radunonza communal. El arva la radunonza fagend beinvegni als presents ed engrazia d'haver dau suatientscha agl invit. In special beinvegni fa el al president dalla regenza grischuna, Marcus Caduff.

Suenter la pandemia da Corona ein actualmein l'uiara ell'Ucraina e la crisa d'energia ils temas principals che fatschentan la societad. Quels temas han era influenza silla situaziun economica e caschunan malemperneivladads en connex cun termins da furniziun e cuosts per material per plazzals da baghegiar, che s'augmentan aschia considerablamein. Malgrad quei ei la situaziun da lavur en Lumnezia fetg buna. Igl ei vegniu baghegiu fetg bia igl onn vargau, quei che semuossa era el resultat final dil quen communal.

Suenter duas stads cun bia turists per consequenza dalla pandemia ei la davosa stad puspei stada en rama dils onns vargai, malgrad la bun'aura e pouca plievgia.

Ina stad schi caulda ha era consequenzas sil provediment d'aua. La Lumnezia ei denton ella legrevla situaziun ch'ella ha giu aua avunda, era sch'igl ei stau pli pauc ch'auters onns.

Las alps han giu ina buna stagiun denton entadem la Lumnezia eis ei buca mo la preschientscha dil luf che fa quitaus mobein niev ei uss era il tsschess-ularin secasaus ella val ed attacca schizun vadials vivs. Quei ein denter auter tematicas che fatschentan era la suprastanza communal.

Il vicepresidente Curdin Capeder constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

Seschau perstgisar han:

- Daniel Solèr, Morissen, president communal
- Remo Derungs, Vignogn suprastont communal
- Gian Derungs, Lumbrein, deputau
- Daniel Blumenthal-Lombris, Vella

La radunonza elegia dus dumbravuschs

- Mirko Furger, Cumbel
- Marco Casanova, Lumbrein

#### 2. Protocol dalla radunonza communal dils 18 da mars 2022 (2022/01)

Il protocol dalla radunonza communal dils 18 da mars 2022 ei staus exponius naven dils 14 d'avrel 2022 ella canzlia communal e silla pagina d'internet dalla vischnaunca, pia duront silmeins 30 dis.

Tenor art. 34 constituziun vegn il protocol dalla radunonza communal exponius per investa dils votants sil pli tard in meins suenter la radunonza duront 30 dis en casa communal e

silla pagina d'internet dalla vischnaunca cun corrispundenta publicaziun. Recuors ein d'inoltrar en scret duront quei temps dall'exposiziun alla suprastanza communal. Ils recuors vegnan tractai alla proxima radunonza communal. Decisiva ei aschia la publicaziun silla pagina d'internet dalla vischnaunca (cun corrispundenta publicaziun).

Il vicepresidente communal Curdin Capeder constatescha, ch'igl ei buca vegniu inoltrau recuors en scret aschia ch'il protocol dalla radunonza communal dils 18 da mars 2022 (2022/01) vala sco approbaus tenor art. 34 dalla constituziun dalla vischnaunca Lumnezia.

### 3. Rapport e quen annual 2021

Il rapport ed il quen annual ein uonn per l'emprema ga buca vegni stampai sin pupi mobein ha l'administraziun communal tarmess ils 05 da settember 2022 in flyer ellas casadas. Quel cunteneva in QR-Code, che ha dau la pusseivladad da vegnir directamein silla pagina d'internet dalla vischnaunca per leger ils documents online. Tut tgi che ha tuttina giavischau il rapport ni il quen annual en fuorma da pupi ha saviu s'annunziar tier la canzlia communal ed ha saviu retrer leu ils documents per investa.

Per la gestiun da finanzas valan las determinaziuns dalla constituziun communal e specialmein era l'ordinaziun cantunala da finanzas per las vischnauncas relaschada dalla regenza ils 25 da settember 2012.

Il vicepresidente communal Curdin Capeder presenta il quen annual 2021 e dat ina survesta generala dallas cefras principalas.

Il quen annual 2021 cuntegn las parts

- Resultat cumplet
- Survesta rendaquen e cefras indicativas
- Quen da gudogn e sperdita
- Quen da gudogn e sperdita (tenor funcziuns)
- Quen d'investiziun
- Bilanza per ils 31-12-2021
- Quen dalla circulaziun dil mieds finansials
- Annexas tier il quen annual 2021
  1. Principis da presentaziun dalla contabilitad, bilanzaziun e valetaziun
  2. Cumprova digl agen capital
  3. Survesta dallas retenziuns
  4. Survesta dallas participaziuns
  5. Survesta dallas garanzias
  6. Survesta da rescheviders da gronds pagaments
  7. Survesta dalla facultad finansiala
  8. Survesta dallas investiziuns bilanzadas dalla facultad administrativa
  9. Ulteriuras indicaziuns
    - 9.1 Fatschentas extraordinarias
    - 9.2 Contribuziuns garantidas dil stadi, cantun e tiarzs
    - 9.3 Regulaziuns da branscha per las amortisaziuns linearas dils camps da provediment ed allontanament che vegnan finansiai cun taxas
    - 9.4 Aczias e secrets da participaziun ella facultad finansiala
    - 9.5 Tractament special da facultad administrativa tier la midada sin MAC2
    - 9.6 Valetaziun dils beins materials dalla facultad finansiala – divergenzas dalla valor commerciala
    - 9.7 Indicaziuns dalla facultad da gudiment buca blianzada
    - 9.8 Controlla dils credits d'obligaziun
- Divergenzas preventiv communal 2021 cun quen communal 2021
- Survesta stan dils projects

Resultat cumplet	quen 2021		quen 2020	
	cuosts	recav	cuosts	recav
Quen da gudogn e sperdita	15'278'221.08	18'687'919.23	15'533'846.33	17'100'140.33
<b>Resultat quen gudogn e sperdita</b>	<b>3'409'698.15</b>		<b>1'566'294.00</b>	
Quen d'investiziun	3'598'022.37	1'089'357.65	5'776'425.31	1'707'165.95
<b>Resultat quen d'investiziun</b>		<b>2'508'664.72</b>		<b>4'069'259.36</b>
Surpli d'entradas quen da gudogn e sperdita	3'409'698.15		1'566'294.00	
Deposit finanziaziun speciala	71'441.55		38'667.40	
Prelevaziun finanziaziun speciala		266'545.95		251'229.40
Amortisaziuns	1'418'850.35		1'479'440.00	
<b>Atgna finanziaziun (cashflow)</b>	<b>4'633'444.10</b>		<b>2'833'172.00</b>	
Resultat quen d'investiziun		2'508'664.72		4'069'259.36
<b>Deficit ni surpli da finanziaziun</b>		<b>2'124'779.38</b>		<b>1'236'087.36</b>

### Survesta rendaquen

Quen da gudogn e sperdita sur treis scalems		quen 2021	preventiv 2021	quen 2020
<b>Cuosts da menaschi</b>		<b>13'246'879.62</b>	<b>14'111'025.00</b>	<b>12'875'748.53</b>
30	Cuosts da personal	5'142'592.24	5'345'670.00	5'074'540.84
31	Cuosts da material e menaschi	4'232'017.33	4'702'080.00	4'149'082.14
33	Amortisaziuns facultad administrativa	1'418'850.35	1'553'800.00	1'479'440.00
35	Deposit en fondos e finanziaziuns specialas	71'441.55	13'175.00	38'667.40
36	Cuosts da transfer	2'381'978.15	2'496'300.00	2'134'018.15
37	Contribuziuns transitorias	0.00	0.00	0.00
<b>Recavs da menaschi</b>		<b>15'922'151.53</b>	<b>13'662'090.00</b>	<b>14'643'999.33</b>
40	Recav fiscal	8'198'677.80	6'452'000.00	7'291'234.80
41	Regals e concessiuns	1'446'154.90	1'356'000.00	1'412'522.55
42	Indemisaziuns	1'881'898.98	1'627'680.00	1'914'207.63
43	Divers recavs	16'648.70	28'000.00	23'950.30
45	Prelevaziuns ord fondos e finanziaziuns specialas	266'545.95	350'880.00	251'229.40
46	Recav da transfer	4'112'225.20	3'847'530.00	3'750'854.65
47	Contribuziuns transitorias	0.00	0.00	0.00
<b>Resultat dall'activad da menaschi</b>		<b>2'675'271.91</b>	<b>-448'935.00</b>	<b>1'768'250.80</b>
34	Cuosts da facultad	470'276.76	352'400.00	1'066'071.25
44	Recav da facultad	1'204'703.00	814'284.00	862'515.05
<b>Resultat da finanziaziun</b>		<b>734'426.24</b>	<b>461'884.00</b>	<b>-203'556.20</b>
<b>Resultat operativ</b>		<b>3'409'698.15</b>	<b>12'949.00</b>	<b>1'564'694.60</b>
38	Cuosts extraordinaris	0.00	0.00	0.00
48	Recav extraordinari	0.00	0.00	1'599.40
<b>Resultat extraordinari</b>		<b>0.00</b>	<b>0.00</b>	<b>1'599.40</b>
<b>Resultat total quen da gudogn e sperdita</b> (+ = surpli dils recavs / - = surpli dils cuosts)		<b>3'409'698.15</b>	<b>12'949.00</b>	<b>1'566'294.00</b>
39	Scuntradas internas	1'561'064.70	1'531'325.00	1'592'026.55
49	Scuntradas internas	1'561'064.70	1'531'325.00	1'592'026.55

Quen d'investiziun		quen 2021	preventiv 2021	quen 2020
<b>Cuosts d'investiziun</b>		<b>3'598'022.37</b>	<b>5'896'500.00</b>	<b>5'776'425.31</b>
50	Beins materials dalla facultad administrativa	3'598'022.37	5'896'500.00	5'776'425.31
51	Investiziuns sin quen da tierzas personas	0.00	0.00	0.00
52	Beins d'investiziun immaterials	0.00	0.00	0.00
54	Emprests	0.00	0.00	0.00
55	Participaziuns e capital da basa	0.00	0.00	0.00
56	Atgnas contribuziuns d'investiziun	0.00	0.00	0.00
58	Investiziuns extraordinarias	0.00	0.00	0.00
<b>Recavs d'investiziun</b>		<b>1'089'357.65</b>	<b>729'360.00</b>	<b>1'707'165.95</b>
60	Transferiments da facultad administrativa ella facultad finanziaria	0.00	0.00	0.00
61	Restituziuns	13'726.55	0.00	99'468.75
62	Transferiments da beins d'investiziun ella facultad finanziaria	0.00	0.00	0.00
63	Contribuziuns d'investiziun sin agen quen	1'075'631.10	729'360.00	1'607'697.20
64	Restituziuns d'emprests	0.00	0.00	0.00
65	Transferiments da participaziuns ella facultad finanziaria	0.00	0.00	0.00
66	Restituziuns d'atgnas contribuziuns d'investiziun	0.00	0.00	0.00
68	Entradas d'investiziun extraordinarias	0.00	0.00	0.00
<b>Resultat quen d'investiziun</b>		<b>-2'508'664.72</b>	<b>-5'167'140.00</b>	<b>-4'069'259.36</b>
<b>Atgna finanziaziun</b>		<b>4'633'444.10</b>	<b>1'229'044.00</b>	<b>2'833'172.00</b>
<b>Resultat da finanziaziun</b>		<b>2'124'779.38</b>	<b>-3'938'096.00</b>	<b>-1'236'087.36</b>
<small>(+ = surpli da finanziaziun / - = deficit da finanziaziun)</small>				

### Rapport da revisiun dalla cumissiun da gestiun

Il president dalla cumissiun da gestiun, Ciril Collenberg constatescha:

Igl onn vargau ei marschau fetg bia silla fiera d'immobiglias e sil sector da baghegiar, quei ei semussau el grond diember da damondas da baghegiar.

Las investiziuns ch'eran planisadas han buca saviu vegnir exequidas tuttas. In dils motivs ei, sco menziunau all'entschatta la munconza da temps da planisaziun, da resursas da personal e da material. Per da dretg drovan las proceduras da lubientschas ditg, cu plirs uffecis ein involvai.

Ciril Collenberg engrazia als collaboraturs communals, oravontut era quels ch'ein vegni pensiunai el decuors digl onn e giavischa tut bien ad els. Ils novs collaboraturs beneventa el tier la vischnaunca Lumnezia.

### Approbaziun dil quen annual 2021 e scarica alla suprastanza communal

Essend ch'ei dat neginas damondas ord il plenum damonda il president dalla cumissiun da gestiun, Ciril Collenberg la radunonza d'approbar il quen e dar scarica alla suprastanza communal.

Cun gronda maioritad e senza cuntervuschs ed abstenziuns approbescha la radunonza communal il quen sco el ei vegnius presentaus.

Il vicepresidente Curdin Capeder engrazia alla cumissiun da gestiun per igl engaschi e la buna collaboraziun.

Il rapport annual vegn approbaus unanimamein dalla radunonza.

## 4. Lavurs da catram e remplazzament lingias d'aua ella via da quartier Trutg el vischinadi da Vella

### a) Damonda per il credit supplementar da CHF 135'000

Ils 18 da mars 2022 ha la radunonza communal approbau il project per la sanaziun dad in tschancun dalla via da quartier Trutg el vischinadi da Vella ed ha concediu il credit da CHF 290'000.

Il schef dil departament communal per traffic, ovras publicas ed ambient, Nathan Solèr declara alla radunonza co igl ei vegniu tier quei surpli da cuosts, che pretenda in credit supplementar da CHF 135'000:

Cun ir culla camera tras ils bischels ei vegniu constatau che plirs bischels d'aua ein buca en in schi bien stan sco quei ch'ins veva quintau, per part ein ils bischels schizun smaccai ensemen. Sche la via sto tuttina vegnir cavada si, fa ei senn dad era gest remplazzar quels bischels. Quellas lavurs eran buca quintadas e la midada dils bischels pretendia ch'ei sto vegnir cavau il foss pli profund.

Pervia dalla pintga pendenza dalla via po l'aua buca flessegiar giu bien. Perquei ei vegniu decidiu da metter quater tumbins supplementars per meglierar la situaziun.

Plinavon vegnan daplirs scludiders baghegei en, per aschia saver serrar giu mo parts digl aquaduct en cass da ruttadiras ni reparaturas. Dus hidrants vegnan remplazzai.

La proxima survesta muossa ils cuosts per material e lavurs:

Credit supplementar sanaziun dalla via Trutg			Total CHF
Cuosts supplementars aquaduct			14'535.65
Canalisaziun			50'767.55
Tumbins d'entrada supplementars	4 tocs	3'200.00	12'800.00
Remplazzament armaturas tumbin sut Trutg			10'000.00
Scludider supplementar	4 tocs	2'000.00	8'000.00
Hidrants cun in scludider e conduct DN 125	2 tocs	8'000.00	16'000.00
Lavur da catram			7'000.00
Nunprevediu ca. 5%			6'245.00
+ TPV 7.7 % + rundaziun			9'651.80
<b>TOTAL NETTO</b>			<b>135'000.00</b>

## Conclus

La radunonza communalha concluda unanimamein, senza cuntervuschs ed abstenziuns d'approbar il credit supplementar da CHF 135'000 per la sanaziun dalla via el quartier da Trutg el vischinadi da Vella.

## 5. Rendaquens finals da projects

### a) Midadas dils locals d'uniuns a Cumbel

#### Situaziun iniciala

La radunonza communalha dils 20 d'october 2020 ha decidiu d'approbar il project e da conceder in credit da CHF 350'000.00 per la midada dallas localitads el center communal da Cumbel en localitads per uniuns.

Il project ei vegnius realisau e siara cun cuosts da CHF 293'450.05, pia cun in rest da credit da CHF 56'549.95.

#### Conclus

La radunonza communalha concluda unanimamein e senza abstenziuns d'approbar il rendaquen final per la midada dallas localitads dil center communal en localitads per uniuns cun in rest da credit da CHF 56'549.95.

### b) Biblioteca Lumnezia

#### Situaziun iniciala

La radunonza communalha dils 22 da mars 2019 ha decidiu d'approbar il project e da conceder in credit da CHF 220'000.00 per baghegiar ora las localitads dall'anteriura stizun a Palius, Vella en locals per ina biblioteca.

Il project ei vegnius realisau e siara cun cuosts da CHF 219'272.15, pia cun in rest da credit da CHF 727.85.

### **Damondas**

Rino Caviezel da Vella constatescha ch'igl ei vegniu decidiu enzacu da far pagar nuot pil diever da cudischs e medias dalla biblioteca. La vischnaunca hagi pliras purschidas che vegnien messas a disposiziun gratuitamein, sco per exempel igl access al lag da far bogn a Davos Munts. Ils jasters vegnien en Lumnezia e fetschien diever dallas purschidas e stauschien empau dalla vart ils indigens.

El damonda sch'ei detti ponderaziuns da far enzatgei en fuorma da contribuziuns per la giuventetgna indigena.

Primus Cavegn, schef dil departament communal per planisaziun dil territori ed immobiglias constatescha che la biblioteca ha varga 200 abbonents e ch'ella dat ora denter 300-400 medias per meins. Ei vegni pia fatg diever fetg stedi dalla purschida.

La decisiun da porscher quei gratuitamein seigi vegnida prida avon entgins onns, cura che Duri Blumenthal eri aunc president communal. La suprastonza dad ussa hagi lu surpriu quei aschia e buca fatg midadas. In motiv seigi era che la lavur d'incassar fussi bunamein pli gronda che la valeta dallas taxas che vegnevan dumandadas.

Il vicepresidente communal, Curdin Capeder aschunta che la purschida a Davos Munts vegni finanziada cun ina part dallas taxas turisticas, tuttina sco igl ei era il cass tier la biblioteca.

Rino Caviezel gi ch'el menziuneschi quei mo per dar alla suprastonza communal in input per ponderaziuns.

Cun quella caschun engrazia Curdin Capeder a Petronella Cavegn, menadra dalla biblioteca ed a siu entir team per la lavur prestada.

### **Conclus**

La radunonza communal concluda unanimamein, senza cuntervuschs ed abstenziuns d'approbar il rendaquen final per baghegiar ora ina biblioteca ellas localitads dall'anteriura stizun a Vella cun in rest da credit da CHF 727.85.

## **c) Quen final pilotadi central pil provediment d'aua**

### **Situaziun iniziala**

La radunonza communal dils 05 d'october 2018 ha decidiu d'approbar il project e da conceder in credit da CHF 576'000.00 per il pilotadi central pil provediment d'aua.

Il project ei vegnius realisau e siara cun cuosts da CHF 562'642.10, pia cun in rest da credit da CHF 13'357.00.

### **Damondas**

Marco Casanova da Lumbrein constatescha che systems digitalis porschan era rescas. El damonda nua ch'il server principal seigi installaus e tgei program che seigi en funcziun per segirar il sistem encunter influenzas jastras.

Primus Cavegn, schef dil departament communal per planisaziun dil territori ed immobiglias replica: Il server seigi installaus ellas localitads dalla canzlia communal a Vella giu el tschaler. Vinavon declara el che la colligiazion funcziuneschi sur ina lingia da VPN, che sappi vegnir aviarta mo sch'ins enconuschi il protocol. Autramein seigi ei buca pusseivel da vegnir sil sistem. Quel vegni ultra da quei aunc segiraus cun ina firewall sco quei che mintga sistem ei segiraus ozilgi.

Ils reservars cun l'automatisaziun individuala funcziuneschan a moda autonoma ed independentamein dil server.



## Conclus

La radunonza communal concluda unanimamein, senza cuntervuschs ed abstenziuns d'approbar il rendaquen final per il pilotadi central pil providiment d'aua cun in rest da credit da CHF 13'357.90.

## 6. Varia

### 1) Presentaziun da collaboraturs

Essend ch'ei ha dau tier l'administraziun communal pliras midadas da persunal per consequenza da pensiuns, presenta il vicepresident Curdin Capeder ils suandonts collaboraturs, alla radunonza:

- Gabriel Sgier;** naschius ils 27 da december 1988, sesents a Cumbel  
**dapi igl 01. da zercladur 2022 menader dil survetsch tecnic**  
 cun pensum da 40%, naven digl 01. da settember 2022 pensum da 100%
- Ivan Derungs;** naschius ils 27 da fevrer 1997, sesents a Glion  
**dapi igl 01. da settember 2022 canzlist communal**  
 pensum da 100%
- Lenia Collenberg;** naschida igl 01. da fenadur 2003, sesenta a Morissen  
 serrau giu igl emprendissadi mercantil tier la vischnaunca la primavera 2022  
**dapi igl 01. d'uost 2022 secretaria digl uffeci da baghegiar e**  
 persuna da contact per fatgs da baghegiar.  
 pensum da 100%

Plinavon declara Curdin Capeder ch'igl uffeci da baghegiar vegni sustenius ad interim dil biro extern Comuno GmbH, menaus da Thomas Accola a Cuera.

Era segidan Marcus Cavegn e Leonora Blumenthal aunc per in temps intermediar cugl uffeci da baghegiar, quei oravontut en fuorma da cussegliaziun.

### 2) Ulteriuras informaziuns dil vicepresident communal, Curdin Capeder:

- Il selvicultur Hans Müller vegn medemamein pensiunaus il schaner 2023. La piazza ei vegnida scretta ora ed actualmeins cuoran discuors cun candidats. La suprastanza communal vegn ad informar cu ina persuna ei vegnida pladida.
- Ils collaboraturs partents vegnan honorai a caschun dalla radunonza communal dil december.
- Entgins convischins da Suraua vevan fatg in recuors encunter il project per la senda da velo, Nino Schurter Bike Trail. Quei cass ha saviu vegnir sligiaus en in consens vicendeivel ed il recuors ei vegnius retratgs.
- Il traffic public per tariffa nulla vegn puspei purschius igl unviern 2022/2023.
- La tematica davart spargnar energia vegn tractada dalla suprastanza communal e la populaziun vegn informada davart las mesiras.
- La sanaziun dil parcadi Parvalsauns ei actualmeins en lavur. La finamira ei da vegnir alla fin aunc quest'atun, il pli tard la primavera 2023.

### 3) Votums ord il plenum:

Rino Caviezel da Vella damonda tgei che cuori atgnameins enteifer l'Infra Mundaun, ch'era vegnida fundada cun l'idea da colaborar cun la vischnaunca Obersaxen Mundaun.

Ils quens annual dils davos onns hagien mussau relativameins gronds gudogns ed ins savessi impunder quels daners per purschidas turisticas.

Tgei projects ch'ei seigi aunc planisau d'exequir en Lumnezia. Entuorn entuorn vegni investau bia ed en Lumnezia hagi ins il sentiment ch'ei vegni buca fatg bia. Sch'ei fussi buca da fundar ina grupp da lavur che s'occuppassi cun quellas damondas.

Il vicepresidente communal replica:

Alla davosa radunonza communal ein vegni presentai dus projects: Ina scarsolera da Triel giu Vella ed ina tuor da reiver a Triel sper l'ustria da cuolm. Ella votaziun consultativa ei semussau claramain che la tuor da reiver vegn favorisada. Per saver exequir quei project sto denton la parcella pertuccada vegnir zonada entuorn e la valur da quella schazegiada niev. Quei ein process che drovan temps.

Plinavon sa Curdin Capeder constatar che la collaboraziun enteifer l'Infra Mundaun mondi buca propi vinavon. La vischnaunca Obersaxen Mundaun seigi pauc activa e selaschi buca en sin projects che duessen vegnir realisai en Lumnezia. Il patertgar da concorrenza seigi aunc memia ferm.

La suprastonza communal hagi bein giu ideas denton era cheu drovi ei ei adina puspei bia temps process da publicaziuns e lubientschas.

Il Nino Bike Trail ed il Flow Trail seigien dus da quels projects. Plinavon stopien certas lavurs vegnir coordinadas el plan directiv dall'entira regiun Surselva e sappien buca semplamein vegnir exequidas entras la vischnaunca Lumnezia. Tut quei che pretendi consultaziuns tier uffecis drovi semplamein siu temps e savens seigien era instituziuns dalla natira involucadas e retegnien ils projects. Quei seigi denton buca mo en Lumnezia aschia denton era tier autras vischnauncas.

Marco Casanova da Lumbrein damonda co il stan acual dil plan directiv per la planisaziun dil territori seigi.

Curdin Capeder declara che la vischnaunca Lumnezia hagi inoltrau tut ils projects ch'ella giviascha d'exequir al biro da planisaziun che prepara quellas lavurs. In da quels projects ei per exempel la deponia da Porclas. Era quei project sto vegnir risguardaus el plan directiv dalla regiun.

R. Martin Cabalzar da Cumbel constatescha ch'ei vegn investau grondas summas per la correcziun dalla via cantunala en Lumnezia. Tuttina seigi quei in fav en in lag sch'ins meri co la spunda semovi mintg'onn e fetschi empaglia la via. Oravontut naven dallas pradas da Luven tochen viaden suenter Vignogn e tochen Vrin. Quei fatg sapien era inschigniers ed impressaris buca da midar.

Ei sedamonda sche quei seigi bu fatg exerchezis da pumpiers mintgamai leu nua ch'ei brischa e sch'ei fussi bu pli prudent da sanar l'entira costa e trer giu las auas. Ei seigi vegniu discutau gia avon biars onns davart tals projects ed ins hagi schau far studis, che calculavien da lezzas uras cun cuosts da rodund CHF 30 milliuns.

Vinavon menziunescha R. Martin Cabalzar la correcziun dallas vias atras ils vitgs. Actualmein vegnien talas lavurs exequidas atras il vischinadi da Cumbel. A Valgronda vegni baghegiu generus mirs naturals che cuostien bia e da l'autra vart vegni fatg el vitg da Cumbel in mir da betun.

Avons onns seigien las anteriuras vischnauncas da Lumnezia sedustadas da far daquels mirs da betun atras ils vitgs. Ei fussi bia pli bi da far mirs naturals. Plinavon seigien paravias / garadetschas ina buna caussa leu nua che las vias ein teissas ed ei drova in schurmetg. Enteifer ils vitgs seigi quei denton figuras e fetschi oravontut era vegnir la via pli stretga.

A Cumbel eri ins s'engaschus per seivs da lenn. Quellas existien aunc oz e seigien sufficientas ord vesta segirtad. Ei duvrassi bu bia da remplazzar quellas garadetschas cun seivs da lenn, schinumadas seivs grischunas.

La Pro Cumbel seigi sedrizzata tier igl Uffeci da construcziun bassa a Glion (UCB) cun quei giavisch e la vischnaunca Lumnezia hagi era retschert ina copia da quei scriver.

R Martin Cabalzar appellescha alla suprastanza communal dad era s'engaschar per quellas seivs.

Curdin Capeder prenda encunter il votum fagend attent che la vischnaunca ha pintga pusseivladad d'influenzar tgei che schabegia vid la via cantunala.

El sa informar che ad Uresa seigi lantschus in project digl UCB per far drenaschas ella spunda. La vischnaunca seigi involvadi ed hagi era da sorprender ina part dils cuosts.

Martin Sgier, schef dil departament per agricultura aschunta, che tier il project d'Uresa hagi ei bia conducts d'aua sfundrada. Quei seigi era puspei aschia ina project, nua ch'ei ha ina part praus schetgs ed ina part palius. Pia puspei la tematica davart consultaziuns tier differents uffecis ed instituziuns dalla natira, fan vegnir liungas las vias da decisiun.

Ei vegn buca pli giavischau il plaid ed il vicepresident communal, Curdin Capeder siara la radunonza.

El engrazia a convischinas e convischins per la participaziun, pil sustegn e la confidanza demussada enviars la suprastanza communal.

7144 Vella, ils 16 da settember 2022

Il vicepresident:

L'actuara substituta:

Curdin Capeder

Silvana Caviezel